



## Pet dana zajedničkog učenja i istraživanja u Konjicu – Ljetna škola mirovne pedagogije 2025.

U Konjicu smo proveli pet dana učeći o nenasilnoj komunikaciji, mirovnoj pedagogiji i akcijskom istraživanju. Saznajte kako učitelji postaju istraživači i graditelji mira u svojim učionicama.



Od 21. do 25. avgusta u Konjicu smo okupili 42 učesnika i učesnice na Ljetnoj školi mirovne pedagogije, programu Centra za obrazovne inicijative Step by Step u okviru projekta Možemo bolje. Tokom pet dana rada, učitelji, nastavnici i stručni saradnici iz različitih zajednica prošli su kroz intenzivan program kombinirajući teoriju, iskustveno učenje i razmjenu prakse.

Prva dva dana bila su posvećena nenasilnoj komunikaciji, koju nam je približila Zorica Trikić. Kroz likove žirafe i šakala, učesnici su vježbali kako graditi sigurniji i podržavajući prostor u razredu i školi. Simulacije konflikata, igre uloga i zajedničke diskusije pomogle su da bolje razumijemo kako govoriti iz potrebe, a ne iz kontrole.

Trećeg dana otvorili smo temu mirovne pedagogije – razgovarali o tome šta znači graditi pozitivni mir u obrazovanju, kako vlastite vrijednosti oblikuju naš rad i na koje načine možemo u učionici razvijati saradnju, solidarnost i empatiju.

Posljednja dva dana fokusirali smo se na akcijsko istraživanje u školi – pristup u kojem učitelji postaju istraživači vlastite prakse. Radili smo na identifikaciji problema, formulaciji istraživačkih pitanja i ciljeva, te na izradi nacrtu akcionih istraživanja. U malim grupama razvijali smo ideje, dogovarali korake i postavljali temelje za nastavak saradnje u narednim mjesecima. Program smo zaključili zajedničkim prezentacijama istraživačkih planova, peer review razmjenom mišljenja i dogovorom o budućem mentorstvu i podršci.

Ovih pet dana pokazalo je da učitelji mogu biti graditelji mira u zajednicama. Nastavljamo dalje kroz akcijska istraživanja i mentorsku podršku, uvjereni da zajedno možemo graditi škole kao sigurne prostore za svu djecu.

Ljetna škola mira organizirana je u okviru projekta “Možemo bolje” koji finansira Evropska unija, a zajednički provode Evropska unija u Bosni i Hercegovini, United Nations in BiH, OSCE Mission to Bosnia and Herzegovina i Vijeće Evrope - Ured u Sarajevu. BiH Može Bolje

## Collections

[Inspiriraj druge](#)[Istraživanje](#)[Projekt](#)[Objava](#)